

# Stap Helpem Bebi Brata

**I Kam long Lucy Stevenson Ewell**  
(I kamaot long wan tru stori)

*stori ia i hapen long Saot Afrika.*

Lashia i gat wan niufala bebi brata. Nem blong hem, Liam. Hem i gat blak hea mo ol smosmol han mo lek. !Hem i naes tumas!

Be samtaem blong gat wan niufala bebi insaed long famli i had. Oltaem mama mo papa tufala i bisi naoia. Mo Liam i kraekrae tumas.

"?Mama, yu save ridim wan stori long mi?" Lashia i askem.

Mama i se, "Bae mi mas wasem Liam insaed long besin blong swim. "Bae yu save ridim wan stori wetem Ariana."

Lashia i sidaon long flo wetem smol sista blong hem. Tufala i tanem ol pej blong wan buk. Be i no semmak taem we mama stap wetem tufala.

"?Papa, bae yu save pleplei wan gem wetem mi?" Lashia i askem.

"Mi nid blong helpem mama wetem bebi bifo mi go long wok," papa i talem.

Lashia i mekem fes blong hem i nogud. !Mama mo papa i neva gat taem blong stap wetem hem nao! Oltaem tufala i stap helpem Liam.

I no longtaem papa i aot blong go long wok. Mama i putum Liam i go daon blong slip smol. Hem i sidaon wetem Lashia mo Ariana long sofa jea. Hem i taet.

*I nogat wan  
i gat taem  
blong kam long  
Lashia naoia.*



Mama i talem, "mitufala i bin stap bisi tumas wetem Liam." "?Yutufala i misim mitufala smol?"

Lashia i saksakem hed blong agri. Hem i filim olsem se bae hem i wantem blong krae.

Mama i haggem Lashia mo Ariana. "Liam i nidim bigfala help naoia from se hem i smol tumas. Hem i no save mekem eni samting yet hemwan olsem we yutufala i save mekem."

"Mi save," Lashia i talem.

"Be sapos yu wantem, yu save helpem mi blong kea long Liam." Mama i smael.

"?Tru?" Lashia i askem. Hem i laekem aedia ia.

"?Mi tu?" Ariana i askem.

"Yu tu," mama i talem.

I no longtaem, Liam i stat blong krae. Taem mama i jenisim daepa blong hem, Lashia i karem wetwet pepa tawel blong waepem hem i kam long mama.

"Tangkyu," Mama i talem.

Long nekis dei, taem Liam i swim, Lashia mo Ariana i lukaot wan klin klos blong hem iwerem. !Klos ia i gat ol naes smosmol animol long hem! Tufala i karem i go long mama mekem se hem i save mekem Liam i werem.

"Tangkyu," Mama i talem.

Lashia mo Ariana tufala i tingting long ol narafala wei blong help. Tufala i mekem gud bed blong tufala evri moning, mo i no gat wan i talem long tufala blong mekem. !Samtaem tufala i mekem bed blong mama mo papa tu! Mo taem we i taem blong kaekae long aftenun, tufala i helpem papa long kijin.

"Tangkyu," Mama mo papa i talem.

Taem Liam i krae, Lashia i traem blong helpem hem blong i harem gud bakegen. Hem i karem hem mo toktok long hem long wan kwaet voes. Liam i no save talem tangkyu yet. !Be wan dei hem i smael bigwan long Lashia!

Lashia i smael i gobak long hem. !Hem i glad se hem i save helpem bebi brata blong hem mo mama mo papa blong hem tu! ●



Long  
wanem  
wei nao  
Lashia  
i helpem  
famli  
blong  
hem?